

蠹南嶠

翁齋谷

詞詞詞



詞 谷 嶰

撰 瑄 曰 馬

王雲五主編

叢書集成初編

嶠谷詞及其他二種

中華民國二十五年十二月初版

發行人

王

上海河南路

五

印刷所

商

上海河南路
務印書館

發行所

商

上海及各埠
務印書館

周

◆ D 六二一

嶢公詞

祁門 馬曰琯 秋玉

百字令

自述

半生情味。歎飛光激箭。流年隨手。踏遍槐花成底事。蠟燭三條孤負。洗墨池荒。畫眉人老。蕭索閑門舊。添丁詩句。玉川何日纔就。贏得玉柱金庭。銀濤雪屋。湖海籠襟袖。回首東華塵土夢。布襪青鞋還又。桑柘騎牛。滄浪吹笛。沮溺眞吾耦。從今以往。樂天惟是歌酒。

木蘭花慢

秋帆

展新蒲數幅。喜無恙。入空濛。和敗葉爭飛。冷雲齊渡。潦水遙通。烟籠。幾層浪裏。傍蘆花。欹側過青峯。黃鶴題詩暮雨。垂虹吹簫西風。孤

篷。兩岸掠丹楓。導渚聽征鴻。試相尋賀老。夜深明月。載酒江東。秋窮。客程倦矣。挂愁心木落正霜濃。卸處日斜荒垓。到時夜半疎鐘。

憶故人

樊榭歸里。嘯齋買舟偕往。作西湖之游。相隔彌月。悵然有懷。

竹杖芒屨。素心乘興西湖去。吳峯越巘最宜秋。剛與潮相遇。山館憶君幾度。待歸帆歸來恐暮。西泠攜酒。東郭吟詩。離情三處。樊榭家杭之城東

河傳

夢醒人靜。小亭幽境。蝶倦仍翻。蟬殘尚咽。秋意半上闌干。竹檀欒。雨聲何處喧茶鼎。斜陽影。射入文窗冷。閒愁漫遣。料理翠墨烏絲。寫新詞。

金菊對芙蓉

莎圃晚秋

曲巷閑行。幽坊乍轉。重來門徑猶諳。記池荷的皪。岸柳參覃。前時不盡登臨興。詠新詩酒污青衫。而今秋晚。蓉殘露落。菊老霜酣。過眼往事休談。但心情漸減。衰鬢頻添。上危亭極目。無限晴嵐。那能泛艇空濛去。對烟水便擬江南。淹留竟日。蝶依莎砌。蛩近湘簾。

探春慢

綠展平波。青浮遠岫。記得年時春早。乍說收燈。又聽賣薺。景物暗催人老。待少停遊屐。便燕語鶯啼不了。試來曳杖荒邨。野梅香破多少。隨意踏尋芳草。問次第花風。幾番吹報。鄧尉溪橋。孤山水寺。是我向時曾到。舊友重逢處。訝雙鬢而今都皤。買取香醪。風前同寫懷抱。如此江山

集平山堂

醉翁去後風流歇。春風僅餘楊柳。碧葉移香。紅芳薦飲。還憶當年歌酒。文章太守。看壁上龍蛇。墨痕飛走。極目雲平。五州烟樹帶晴岫。清鐘聲出古寺。問棲霞塢影。今日存否。倚檻聽松。分泉淪茗。且共閒消清晝。幽懷試剖。歎白髮重來。闌干依舊。一片斜陽。莫教杯去手。

相見歡

時山館牡丹將放。適西疇臥疴初起。喜見過花下。相留竟夕。因譜此解。

廉纖雨溼荒階。破蒼苔。却喜故人相過牡丹開。花欲語。春幾許。且徘徊。一片露香新豔待君來。

揚州慢

雨後。登康山。

苔徑盤紆。草堂欹側。十年不上康山。剩風風雨雨。挂薜荔頽垣。憶當日斯人溷跡。琵琶腰鼓。清議成冤。倚危闌新霽涼風。淨咽鳴蟬。隔江隱隱。帶修蛾時露青巒。笑一簣非山。女牆縈繞。高出塵寰。唱到荒唐詞曲。談前事幾輩淒然。看殘陽西下。投林棲鳥飛還。

鵲橋仙

詠鵲尾爐

首山博采。名香暗炷。翠羽何來飛墮。是誰銀葉鑪更翻。巧鑄就雕陵一箇。卯金遺範。東宮舊事。幾輩詞人傳播。炎精灰冷迹還留。好伴我秋檠倡和。

予家舊藏有漢雁足燈檠。

河傳

南園觀秋漲

漫流平岸。白蘋天。重過城南舊園。上塘下塘秋水連。延緣葦閒人刺

船。照影空明鷗鷺喜。荷葉底。風颺吟情起。詠滄浪。天一方。曲廊薄
衣愁暮涼。

眼兒媚

白秋海棠

盈盈冰淚滴。鮫綃。腸斷越嬌嬈。青苔滿地。涼蟾映戶。此意難描。漢
宮愁絕。胭脂冷。酒暈玉容消。三秋夢短。六銖衣薄。銀漢迢迢。

行香子

憶焦山舊遊

買得低篷。攜得孤筇。憶年時不負清冬。斜陽看竹。夜月聽鐘。正約吟
朋。尋老衲。狎漁翁。雨後蒼松。霜後丹楓。對烟江塵夢都空。行隨鶴
侶。飲伴猿公。但聽寒潮。聽落葉。聽飛鴻。

長相思

效獨木橋體

花外樓。柳外樓。燕子飛時嬾下樓。夕陽紅半樓。風滿樓。月滿樓。一斛閑愁貯滿樓。郎居何處樓。

南浦

送王梅泚入都

冬冷客辭家。渺江流。隔斷西津瓜步。交是舊情真。淹留地。早又寒風酸楚。蘆花似雪。雁來何故人偏去。回首可憐楓葉落。夜夜夢遊烟渚。軟塵纔洗征衣。歎依人不許江鄉久住。梅子正黃時。闌干畔。記得小樓聽雨。歡娛未幾。對清尊離情重數。堤柳不堪霜後折。斜日半牆誰語。

明月逐人來

癸酉山館元夕。用去年韻。

林深烟澹。梅橫香淺。山樓外華鐙幾點。暗窗搖影。漸漸風吹面。靜裏聲喧人遠。猶記年時。攜手星橋月觀。觥心凸堂深波捲。到得而今。春不由人管。坐聽更籌頻轉。

一痕沙

環溪梅影

浸得春魂能瘦。映得香心能透。風定碧無痕。寫雙身。清到遊魚難覓。寒到流雲一色。倚竹更穿松。淺波中。

鷓鴣天

春日山館晚晴。偕半查同賦。

孤負韶光不等閑。梅花羞澀杏花慳。雨餘簾卷明斜日。風定雲開見遠山。初蝶舞。暮禽還。撲人料峭是春寒。安排酒榼詩筒了。同上江南鴨嘴船。

一翦梅

立春後一日。同人集晚清軒。補作送春之會。共賦此調。
牆角餘花落。瘦藤惹起閑情。觸起離聲。春歸幾日計行程。鶯語分明。
燕語丁甯。欲挽芳蹤苦未能。已過江亭。又過山城。閉門還復拾飛英。
茶煮孤鐺。酒煮雙螯。

謁金門

棟花和玉几。

殘紅掃。風信這番吹了。紫霧濛濛香穗小。春餘無限好。簷外綠陰黃鳥。
剩得茶烟輕裊。不暖不寒庭院悄。看花人欲老。簷外綠陰

齊天樂

送樊榭歸湖上

廉纖細雨侵衣袂。梅天最難調攝。苦筍過牆。青苔上砌。客裏光陰飄

忽懷歸念切。擬暫淪茶鐺。少留吟篋。只恐紅衣待君香散半湖月。吹簫何處濯髮。浸空明一片。銷盡炎熱。喚艇邀涼。凭欄覓句。沙際白鷗凝雪。那堪閒闊。定驀憶山齋。幾般縈結。莫負秋窗。滿林蟬亂咽。

澡蘭香

午日。兒童以蒲作劍。佩之相戲。因亦辟邪之意耳。醉後。因檢夢窗澡蘭香譜之。聊用遣興。

根蟠九節。葉隱三花。獵獵弄風澗底。靈苗勁處。瘦脊抽時。宛似匣中秋水。正天中競翦青青。含景蒼龍躍起。懸向衡門。笑比離騷蘭芷。老去雄心減盡。但解牀頭。辟邪而已。銀垂蒜押。豔吐榴房。合與艾枝同繫。漫嘲他笑舞婆娑。剩引深杯泥醉。試配取射黍瑯弓。午香菰米。

疎影

荷影

陂塘幾曲。愛露盤一向。照來清淺。本自無塵。依約凌波。空裏淡痕香遠。聘婷自顧。羞明鏡。渾不似。靚妝朝暉。夜深時。素魄潛窺。又逐水風吹亂。遙憶江南舊種。悟分身淨界。秋思同幻。鷗鷺沙邊。幾回夢覺。錯恨玉容消滅。吳娃漫撥。邪溪棹。歌未歇。露凝烟晚。試歸來。描取紅情。寫上小窗東絹。

浪淘沙

席上分詠。得風荷。

向背一池翻。香散雕闌。紅粧容易變秋顏。水鳥欲棲棲未穩。翠被生寒。客夢落江天。搖蕩吳船。露零豈爲熱龍涎。宛似羊家張靜婉。撩亂雲鬟。

浣溪紗

夏日湖上

垂柳陰陰繫短篷。綠荷香散水雲空。石橋斜界小亭東。幾日心情
傷舊雨。暫時欄檻愛清風。一聲幽鳥出蘆叢。

明月引

行菴爲同人會吟之地。年來故侶零落。愴然於懷。因賦此
曲。

蕭蕭禪院冷秋鐘。約過從。怯過從。老樹疎枝。幾輩倚吟筇。風又易流
雲又散。徑苔裏。一條條。認舊蹤。舊蹤舊蹤總迷濛。飛斷鴻。叫斷蛩。
記也記也記不起。魂夢相逢。纔一追思。斜日下牆東。鬚鬢看看凋落
盡。拌醉也。把衰顏。付酒紅。

木蘭花慢

秋燈

漸生衣薦爽。透窗眼。燄初新。更桐雨淒清。竹風蕭颯。一盞堪親。宵分。

書帷乍卷。向孤蛩聲裏伴吟身。瘦對花垂硯北。淡和月映籬根。懷
人。翦處不辭頻。幽思與誰論。况霜白吳橋。楓青湘廟。閃爍猶存。愁痕。
枯棋半局。子空敲涼影豆花邨。何似烟江釣艇。星星明滅黃昏。

買陂塘

仲秋集東園。

又涼飈掃除殘熱。一園清氣如水。亭皋木葉蕭蕭下。新雁挂雲初霽。
風日美。杖短策秋原。直愛遙岑對。漁梁漲矣。正釣艇纔收。潮痕漸上。
閒共坐沙觜。同遊輩。卅載凋零有幾。看花情事堪記。羊燈兔魄渾
如昨。誰領冷香寒吹。聊小憩。歎鬢點吳霜。淒絕難成醉。餘霞散綺。剩
今日重來。小山吟罷。滿耳樹聲碎。

渡江雲

觀文休承吳淞草堂圖。因憶梅泮京師。

波光搖素練。空濛一片。望去與雲平。是誰家矮屋。竹樹參差。隱約寫
閒情。漁菴蟹舍。想此中定有吟聲。還憶起京華遊侶。何日返柴荆。
堪驚。十年賣賦。三載依人。怕重看青鏡。第一是拋荒釣手。孤負鷗盟。
多時不見長橋影。惹清愁兩鬢星星。書寄與。君應急喚歸舲。

訴衷情

寒蛩

那堪秋去耳還聞。牀下更相親。忘卻麤疎聲老。猶自怨黃昏。無氣
力。與誰論。雨紛紛。一燈如豆。兩鬢成絲。怎不消魂。

臨江仙

九日。環溪看芙蓉。

澹蕩池邊倒影。參差檻底愁紅。環溪漁屋水雲空。秋心渺何許。涼思
入芳叢。寒木還憐楚客。拒霜可遇陶公。重陽又是雨濛濛。閒來能

載酒。也不負西風。

四字令

秋雨初涼。同西唐、玉井、坐山館紫薇花下。

濃雲半封。疎花小紅。良朋幾箇過從。怯闌干晚風。西窗暗蛩。南樓暮鐘。吹來都入簾櫳。看茶烟裊空。

青玉案

畢園訪秋

涼雲閣住闌干外。似做出秋情態。病骨年來差健在。廢池吹縠。野田方罫。著眼都如畫。小山招隱寒香墜。雁落吳天數聲碎。喚艇支筇。惟我輩。碧搖蕉影。響分竹籟。幽思今朝最。

憶少年

詠雁來紅

幾番風露。幾家庭院。幾般顏色。芳華將盡也。反絢朱凝赤。塞雁一聲秋欲滴。對秋花少舒愁寂。丹楓將近也。又怎生留得。

風入松

舟宿焦山

空江歲晏記聯吟。清磬一燈深。梅花可復重相識。能留客還是沙禽。憐爾風前逸韻。添予篷底幽心。長松修竹足登臨。一夢冷雲侵。欹眠風靜波聲小。酒醒後滿耳冰琴。舊友三年如昨。霎時枕上分襟。

百字令

送竹町對鷗歸錢唐

釀寒天氣。正林空歲晚。蕭蕭風雪。自是鄉關縈夢寐。枕上愁心千疊。吟事輕拋。歡情頓減。欲說還嗚咽。津門人至。一舟同臥江月。還憶春杪重湖。綠陰行遍。波影清人骨。襟上酒痕都化淚。眼底風花銷歇。

斷壁猿啼。元雲雁叫。四野飛黃葉。贏得聯牀相話。夜燈明滅。

壺中天

分詠飲事。得酒兵。

清尊紅燭。賈詩壇餘勇。策勳三雅。旗鼓定教高北府。萬仞愁城能下。芳草雞缸。葡萄蠡琖。誰是先登者。廚頭人醉。喚醒還應驚詫。最愛
酣鬪功多。鉤爭拇戰。行陣秦吳亞。走入南康廳事避。轉憶安西司馬。壁上從觀。壚邊卻立。雨驟風馳也。休言嗜飲。此鄉也堪稱霸。

花閒憶

上元前一日。集晚清軒。泚江太史以此闕寄東。依韻和之。試燈又是年時節。疎梅欲破昏黃月。六曲護風屏。斜連一榻橫。新
詞勞寄省。小炷爐香領。春到徑苔新。清尊約故人。

唐多令

野泛

久雨滯游嬉。新晴手重攜。泛扁舟還叩柴扉。回憶綠牋題句後。春又過。一旬期。彌望水平隄。橋頭柳色齊。人影亂驚起鷗鷺。十二紅闌都倚遍。竟忘却。日沈西。

壺中天

環溪紫藤

一灣流水。架小橋三折。濛濛花塢。翠幄陰垂香不散。透入春衫如霧。密葉蜂尋。瘦條蝶抱。到此剛亭午。暖風輕颺。年年花下題句。況是闌角欹紅。苔堦偎綠。滿眼飛晴絮。宿酒朝來還未醒。幾箇瞢騰春去。雨彼鬢陀。現茲瓔珞。天也留人住。聽殘啼鳥。斜陽遙挂高樹。

柳梢青

效許圭塘體。與樊榭、漁川、弟半查同作。

日麗花酣。土風清潤。到處幽探。石塢支筇。水邨喚渡。沙岸乘籃。魚
蟹蟹。簪澄潭。痕一抹。烟梢嫩嵐。稻飯紅蓮。莼羹碧澗。好箇江南。

浪淘沙

秋江晚泊。時甲戌八月二十七日也。

江闊晚霞高。無意迎潮。蘆花瑟瑟柳蕭蕭。鷗鳥見人偷眼去。飛過溪
橋。沙際小停橈。酒榼詩瓢。更將清興話迢遙。回首昨宵烟翠裏。秋
色南朝。

南 齋 詞

馬 日 瑤 撰

本館據粵雅堂叢
書本排印初編各
叢書僅有此本

南齋詞卷一

祁門 馬曰璐 佩兮

百字令

自述。

平生堪笑。算浮湛里巷。年華虛擲。却是天公眞解事。未付凌雲雙翮。
疎箔遮門。幽蘭紉佩。自鼓湘靈瑟。有書千卷。落然惟此朝夕。曾幾
酒熟茶香。輕教負了。花底分吟席。嶽色河聲曾攬結。總是閒中蹤蹟。
小婦東方。大兒文舉。豪氣非吾匹。與人無競。頓忘青鏡頭白。

月上海棠

憑闌最好昏黃後。月初圓。花正滿時候。萬疊千圍。影垂垂。睡容銷酒。
籠烟外。一片波光壓繡。雙禽棲處描難就。認梨花。不似梨花瘦。玉
局飛仙。漫哦吟。問曾知否。西樓曉。尙留殘雲護守。

春去也

送春。

春去也。樓外夕陽斜。亂擲榆錢。渾不管。多情猶是算楊花。相倩到天涯。

河傳

秋日登
看山樓

竹院涼漸。袂衣催換。石徑留苔。風爐試茗。愛看遠岫如揩。展秋懷。高樓三五斜行雁。殘陽晚。酒半輕雲卷。秋容易老。還怕後夜重過。葉飛多。

憶故人

懷樊榭
嘯齋

江影搖涼。故人同所。澄波去。夜闌清露滴篷窗。想見吟聲苦。遙問兩湖鷗鷺。近中秋。圓蟾極浦。水仙祠冷。伍子山空。看潮何處。

定風波

聽意田
談往事

往事驚心叫斷鴻。燭殘香灺小窗風。噩夢醒來曾幾日。愁述山陽笛韻併成空。遺卷賴收零落後。牢愁不畔盛名中。聽到夜分惟掩泣。

蕭寂。一天清露下梧桐。

惜黃花

九日禪
智寺

前朝蕭寺。故宮遺址。撥荒荆。飲寒泉。孤亭同倚。葉響下遙林。雁影沈殘水。畫不到。舊時歌吹。黃花開矣。素秋如此。歎重過。易飄零。滿襟涼思。擁鼻晚鐘前。側帽西風裏。一轉瞬。碧雲千里。

金菊對芙蓉

曲溪招飲莎園時
憲田西歸俱臥疾

梵剎題糕。離宮弔古。佳辰回首駸駸。悵無多冷豔。何處幽尋。蕭疎柳老東城曲。重陽展。招我登臨。半池淺水。數聲斷雁。一片秋心。有酒好與頻斟。莫等閒負了。斜日園林。問西風陳蹟。北郭清吟。故人漳浦重來否。怕重來。不似而今。殘花欲謝。涼蟾易缺。短髮難簪。

行香子

憶焦山
舊遊

冠絕平生。那易忘情。好江天。勝處都經。幽襟淡愜。夜閣寒清。有鶴飛

空梅著夢。月窺櫺。雲影冥冥。鐘韻星星。一追思。詩卷崢嶸。佛燈無盡。山色常青。趁風未起。人猶健。留堪橫。

漢宮春

定窰蠶蛾香合傳
是宮窰中物因賦

素旂銀泥。問蟲天舊製。劃自何時。詩人向曾掘得。一樣如規。冰蛾蠕動。認春山。八字脩眉。休揭起。鷗斑盛處。妒他蜂蝶雄雌。幾度沉埋。天水。歷春鷗秋蟀。歲籥潛移。遙思織宮繭館。心字香知。雲垂寶枕。篆綢繆。珥後殘絲。還試與。妍粧釵畔。暖金雪裏同攜。暖金
盒名

探春慢

柳眼回青。蘭芽吐白。天氣留寒做暖。風驗初三。辰迎涉七。殘雪林陰猶滿。已辦吟筇去。擬約住。春心教轉。剛逢遊伴重來。去年何處亭館。入眼梅紅一翦。早水活雲生。酥香泥軟。誇酒旗高。聽鶯院迴。次第芳蹤難緩。待取收燈後。煙汀外。扁舟堪喚。過却花期。歸來猶認雙燕。

渡江雲

觀吳松草堂圖。因憶梅泚京師。

并刀誰翦得。浪花滿眼。活脫是鱸鄉。甚高人占取。渺渺瀰瀰。畫裏著茅堂。亭荒釣雪。舊風流總付斜陽。還賸得。眠雲臥月。千載有王郎。蒼茫。三年白社。兩載東華。攪離愁千丈。億那日。霜題暮葉。雨話閒窗。飛鴻昨遞春來信。說歸來。猶趁梅香。歸未準。吟魂先渡煙江。

蘇姜直至嚮菴草堂句。笛臥松

江明月。裝披笠澤歸雲。

掃花遊

春分。

春來幾日。被燕翦輕裁。遽驚如許。珠歌翠舞。又匆匆截斷。社公微雨。寂寞鞦韆。寒食歡遊尙阻。莫虛度。把未去韶光。從此重數。芳信成。淒楚。看半在花梢。半歸塵土。華年坐誤。只藏鬪刻蠟。不隨飛羽。挑菜前期。恍似佳人再遇。試凝佇。怕錫簫。杏煙吹暮。

如此江山

春日平山堂

幾回閒覓行春路。催春又聞啼鳥。一徑松聲。千年水品。愁絕吟筇。重到堂高望杳。早江外脩眉。數痕青了。倚遍闌干。海門雲氣自飄渺。清商同理舊曲。悵蠻箋墨暗。總付鴻爪。雨砌催香。霜池換碧。贏得尊前懷抱。春風易老。只楊柳依然。那堪斜照。壁上龍蛇。斷碑埋細草。

相見歡

三月望後一日。喜西隱見過。時朝雨初霽。牡丹正放。

故人藥裏關心。隔秋吟。重到小園聽鳥。已春深。相看好。成一笑。展幽襟。別有一闌花氣。破重陰。

壺中天

坐環溪紫藤花下。

暮春時節。正雨潤芳園。草香苔徑。前度桃花渾不見。一架垂藤相引。樹密牽雲。橋橫隔水。妙處閒能領。蜂喧人寂。遊魚空裏吹影。曾記摘蕊娛賓。依稀還認。是年時風景。只恐黃昏春欲去。漠漠紫煙愁暝。散髮哦詩。深杯喚月。月在前山頂。夜深歸去。袷衣雲氣侵冷。

柳梢青

效許圭
塘體

望裏青帘。梅橫竹亞。露出晴嵐。燕子紅樓。楊花深巷。蝴蝶春衫。幾
回夢倚雲帆。染不就波光嫩藍。秧鼓村村。菱歌浦浦。好箇江南。

邁陂塘

新荷

愛田田。乍舒還捲。鈿痕初試圓翠。風裳水佩年時約。又是舊情撩起。
翻嫩紫。看帶荇縈萍。一半平鋪水。眠鷗漫喜。更幾日薰風。一番梅雨。
想見鏡奩裏。參差處。南北東西十里。輕陰堪覆魚戲。天機雲錦還
遲翦。未有畫船來艤。煙檻底。怕香薄。西亭漸到綃衣碎。風輕露墜。趁
弱柄搖詩。柔絲續夢。已解瀉鉛淚。

疎影

桐影

交柯疊翠。看晨光著露。初引清致。啜茗林深。絃外音希。時有綠雲潛
委。蕭疎滿地簾垂午。誤翠羽。參差窗底。愛夜深。淡映明河。雨過嫩陰

如水。還認龍祠舊事。是當年綵筆。憑夢曾寄。怨煞西風。眉月斜時。不與古人同倚。愁來無覓秋聲處。更那料。秋心如此。待好將。一幅煙綃。寫作畫中高士。

點絳脣

水南花墅。
同樊榭作

有竹臨窗。秀枝娟色陰陰遍。冷雲一片。吹滿題詩硯。記得曾來。隔水閒亭館。廊腰轉。酒薰花面。斜日春風晚。

深蘭香 鈿符

輕裁玉篆。巧疊文茸。占却午釵畫永。瑤梁暗裊。翠股雙懸。慣與繭花相並。早相看。辟蠶靈辰。曾壓幽閨鬢影。小小宜人。也似銀旛金勝。底用縈絲作佩。護得粧臺。恁般閒靚。菰香換節。艾碧消年。夢斷楚江明鏡。憶當時。綵鳳銜將。幾向薰風爲整。祇賸得。咒水書朱。翻教愁凝。

揚州慢

雨後登
康山

迂徑梯苔。瘦筇支午。碧天喜放新晴。倚闌干半溼。動幾許遙情。已難覓。當年舊跡。四條絃絕。何處絃聲。聽鳴蟬騷屑。和風吹滿重城。朗吟望極。有脩眉。江外如迎。悵樂府詞工。歌筵夢冷。無限愁生。邈想百年良會。消沈付落日荒亭。看涼雲飛去。林陰移過鷗汀。

長相思

愁中心。悶中心。我有相思一點心。將來作你心。結同心。拆雙心。心字香消驀上心。陶家別有心。

齊天樂

送樊榭
歸湖上。

片帆約共雲陰遠。相看已縈愁緒。淡景邀詩。遙情入畫。綠暗前時來路。汀荷苑樹。有花底魚經。柳邊簫譜。水夢山魂。朗吟飛向鏡奩去。湖頭應憶舊侶。正疎篁露滴。如對幽語。病渴文園。耽佳飯顆。算是襟分幾度。離杯漫舉。待潮落江天。片時延佇。直到涼秋。翦燈同聽雨。

惜紅衣

小漪南池
上坐雨

細點分萍。濃烟暗竹。雨來波際。曲檻閒憑。紅衣動涼思。鷗飛鷺立。同
照影。盈盈一水。清致。塵事盡忘。領微微花氣。漁鄉釣里。橫笛披簑。
還尋舊風味。何人載鶴。一舸柳陰艤。不怕粉痕零落。定有采蓮歌起。
又暮霞流影。倒映碧羅叢底。

浪淘沙

風篴

鸞尾舞清陰。槭槭森森。未秋先自有秋心。何況秋來風又起。戛玉篩
金。繼續倚窗琴。似和微吟。故人門外恰相尋。別派洋州留畫本。泉
冷山深。

鵲橋仙

七夕
立秋

魚雲消影。蛛絲牽恨。愁到今年又別。一年一度泛靈槎。恰逗著金風
時節。針樓粉席。人閒天上。涼意離情誰說。銀河萬里瀉無聲。聽一

片。墜階梧葉。

又牽牛花。

碧羅天色。碧羅雲氣。籠著淡花如染。越窰秋錦小屏風。錯認了星躔一點。娟娟涼露。娟娟殘月。回憶舊時茅店。人閒不是少疏籬。還只怕窗兒雙掩。

霜天曉角

秋河。

疎杵敲商。看銀河隔牆。隔得鸞飛鵲杳。終不隔。是王昌。微茫秋影涼。溼梧飄怨長。倒瀉小池深處。鱗一陣。藕花香。

雨中花

山館雨
中看桂

寂寞兩株松樹底。占不到。月中田地。一簇涼雲。一層涼雨。也把瓊珠試。詰曲闌干邀共倚。怕幾日。瑣奩香碎。水思明朝。山情昨暮。總入閒吟裏。

臨江仙

九日。環溪雨中芙蓉。

圓菊籬邊綻未。嬌蓉池上開多。酒籌詞筆意如何。雁飛窺膩玉。風起浴明波。記得去年今日。竹西亭畔經過。紅萸烏帽惜蹉跎。爲誰雙臉淚。還唱六么歌。

解佩令

秋日。同人坐七峯草亭。

天空鳥過。亭空雲過。碧泠泠。嫩梢千箇。待得秋深奈鎖。日無人同坐。喜清陰。瘦筇分破。行歌也可。醉眠也可。淡襟懷。茶煙一朵。碎影斲金。看不厭。石如裝裹。勝遙山。夕陽錯磨。

訴衷情

寒蟲。

噥噥唧唧幾昏黃。所歷盡愁鄉。已是草根無綠。猶自說淒涼。吟欲絕。思偏長。近單牀。鳴機燈暗。弔月闌空。一片風霜。

定風波

見意田手蹟有感。

定了風波越轍軻。卽看浩劫歷恆河。東野亡來吟興懶。腸斷。偶披遺墨淚痕多。宿草身名歸寂寞。殘陽神采付煙蘿。不忍頻開好藏弄。休語。才人無命可如何。

南浦

送梅泚入都

三載滯京華。算歸來。未暖鷗邊吟席。梅子雨聲中。孤篷底。曾把朋簞同擘。蓴鄉橘市。煙波不解留行客。一舸垂虹。橋下路。怕見冷楓愁夕。如君方朔才高。甚長教乞米。紅塵紫陌。匹馬亂山時。霜風緊。應念玉醪香拆。今來異昔。不堪雙鬢侵寒色。盼得君來。君又去。江上暮雲飛白。

漁父家風

題水雲漁屋

依稀釣罷月來時。雲影漾茅茨。不須更放扁舟去。人臥碧琉璃。邀漁伴。狎漁兒。是漁師。一聲霜笛。兩岸蘆花。飛起鷗鷺。

浣溪沙

點九圖

雪豔冰姿著意描。相思一點託紅椒。殢人春思起今宵。數到東風

花共瘦。得來芳信夢還遙。燕支難把斷魂招。

余向有悼亡梅花卷子。

於中好

補屋。

三間老屋橋西住。取聊蔽。經年風雨。短籬一帶從遮護。只忙了。牽蘿女。空簷雀與空倉鼠。又早是。寒天將暮。風饕雪虐公無苦。只礙了。雲穿處。

鷓鴣天

歲暮子役。風雨舟中。

兔筆魚箋著處安。吟情約共水雲寒。江天夢隔聲聲雨。圖障緣慳面面山。忘日暮。逼年殘。鎮對官河水半灣。雁程若得西風力。翻少篷窗一段閒。

采桑子

期玉井不至。

孤篷隔處橫煙素。盼煞吟朋。孤負吟燈。細雨尖風雁一繩。高城暮色連揚子。江樹寒燈。漁火迷冥。一夕相思落遠汀。

風入松

舟宿焦山

寺門舟泊記嚴宵。清味得來饒。層巖難覓前遊蹟。勝前遊。篷底蕭蕭。雨歇魚天夢闊。鷗飛江影燈搖。紅窗不隔海雲飄。夜悄燼頻挑。魂清夜半翻無寐。和吟聲。一綫寒濤。報道朝來風便。抽帆怕轉松寥。

卜算子

金山歸泊江口逢敏公

衣上浪花多。掠岸舟難住。更有何人得得來。沙際拳寒鷺。瓜渚已炊煙。浮玉仍飛雨。回首江天杳靄中。閒與山僧語。

柳梢青

兩明軒新柳

月縮風牽。枝枝葉葉。掩映樓前。今暮纖眉。昨朝青眼。後日晴綿。等閒只傍吟箋。甚不管。鶯聲嫩圓。種自何時。江潭人老。白髮年年。

綺羅香春寒

借暖簾低。尋芳戶悄。天氣梅前燈後。雨雨風風。一月峭寒依舊。已多時。火徹金猊。又重看。線停鴛繡。憶年來。花發鶯啼。淒清不似這時候。蕭然苔徑嫩約。相對吟箋墨淡。休教輕負。翦翦愁痕。藏取林香澗秀。最難禁。雪點華顛。長泥他。翠扶雙袖。瘦稜稜。歸擁重衾。夜窗人病酒。

又春陰

宿雨籠雲。輕寒殢酒。何日晴光方準。庭院悵悵。過了一分花信。梨玉慳。冪霧誰禁。柳眉鎖。帶煙難認。最消凝。簾捲湘波。欲彈春思緩瑤軫。層層芳靄不散。遙望嵐容似醉。供愁無盡。夢隔江南。曾結幾番燈暈。費爐熏。閒却吟衫。剋畫景。做成離恨。乍憑他。夕照吹開。奈何天際暝。

一痕沙

池中梅影

已是梅花清絕。添映一層晴雪。春入翠篷深。小池心。可有吹香魚聚。魚亦不知香處。玉笛晚蒼蒼。襯雲涼。

鷓鴣天

晚晴

帖子朝朝畫丙丁。晚來才及一分晴。斜臨燕戶籠雲淡。半界花脣帶雨明。攜素約。上高層。闌干紅處遠山橫。縱然說是黃昏近。越布吳鞋自此輕。

浣溪沙

竹粉

淡撲輕勻脫錦綳。香含玉雪不勝情。楚詞書處一層層。可是暖雲潛殺取。却疑涼露暗調成。北窗留看午風清。

蘇幕遮

涼雲

觸幽巖。生暗峽。一片飛空。冉冉輕陰壓。火傘炎官無避法。趁送吟筇。

日午剛遮匝。港沈魚。船聚鴨。愛結花香。移處涼荷插。便有清風來
片霎。莫變紅霞。雨挂空江塔。

思佳客

戊辰冬日。南圻以合歡一株。移植山館。
時余有騎省之戚。因賦此闋。以寄南圻。

葉底花開憶淺紅。茸茸煙穗夜情濃。移來繡閣文紗外。栽向斜陽小
院東。離故土。帶薰風。可憐時節是清冬。知君贈我非無意。欲把芳
名故惱公。

百字令

分詠釀事。
得酒牀。

秫收三畝。是浮蛆泛蟻。經營之始。六尺松根橫據處。中有氤氲天地。
枕麴風高。藉糟人遠。見此心先醉。葛巾微漉。策勳吾事足矣。堪愛
欲咽還流。愁痕滴破。未礙寒宵睡。杜康私語。渾疑雨。撩起篷窗滋味。
色濺珍珠。香蒸雲夢。臥甕人知此。年年偷撇。小槽花下尤美。

青玉案

分詠茶事。
得茶人。

一生只識蒙山路。慣摘遍陽崖樹。香染衣裾雲上屨。竹閒苔裏。野泉靈渚。佩篋常來去。報春好鳥啼難住。穀雨年年又春暮。老盡山中風貌古。鹿麋爲伴。煙霞爲侶。也合陶家鑄。

唐多令

野泛。上巳前二日。

淺水半拖藍。桃紅宿雨含。過籬門。畫裏閒探。鷗鳥不飛魚聚影。船一隻。小橋南。花港接漁菴。斜陽此尙耽。算南園。清景都諳。何日推篷重命酒。眉月好。約初三。

點絳脣

虛舟先生竹根私印刻王耶二字。

兩字秦文。是誰留得良常叟。露鐫霜鏤。翦取凌雲瘦。紙尾曾鈐。奕蛟蛇走。今何有。驗封依舊。天壤名同久。虛舟官驗封司。

謁金門

查梅繁晚樹歸鴉。

孤村遠。流水小橋秋晚。木葉無多霜欲染。昏鴉飛數點。想見野情

蕭散。獨立斜陽數遍。待得寒風翻雪片。柴門依舊掩。

南齋詞卷二

祁門 馬曰璐 佩兮

江城梅花引

行能感舊

十年詞筆擅江城。占秋清。鬪僧清。何事而今林葉半飄零。重到閒庭看竹色。夢魂遠。一竿竿。憶舊朋。舊朋舊朋此經行。風裏萍。曙後星。聚也聚也。聚不似。春鳥和鳴。只有簷前高樹挾濤驚。何況無端輕錄別。人去也。隔江南。又幾程。

換魚兒

秋光

愛秋晴。瘦痕如水。遊氛總化澄澈。英英晶晶無窮意。時向淡中飄忽。清欲絕。算氣斂層空。不妒雲明滅。吟情正怯。看著物生涼。侵衣做爽。潑眼那能說。無多處。白鳥蒼蒹。騷屑。五湖吟思飛越。脩蛾翦翠窺天鏡。鮮墨暗收行篋。愁更切。怕臨水登山。依黯陽關疊。深杯漫別。賸

沆瀣樓臺。琉璃世界。同醉九宵月。

木蘭花慢

秋帆

挂秋風十幅。澄波淨。轉飄揚。共五兩多情。煙蒲無恙。拂露凝霜。高張。
甚時送遠。更涼天。不了帶殘陽。半偃楓林。思闊。孤懸橘岸。情長。蒼
茫。極望渺脩江。去鴈趁斜行。記酒盞詞箋。水雲飛渡。天外鱸鄉。相羊。
暮侵岫影。是何時。吹笛泝瀟湘。猶及菱歌唱晚。一篷月卸樓窗。

南莊右
卸帆樓

又

秋燈

又西風漏永。看一點。竹間幽。正河漢光清。梧桐影淡。回照高樓。悠悠。
露飄半蕊。伴微吟。常認冷螢流。銷却涼堂鬢老。年年移近牀頭。堪
羞。只合背窗休。玉局是誰收。悵花空酒遠。也應怕說。西漆南油。凝眸。
草蟲暗語。待呼來。更帶搗衣愁。思滿漁汀遠火。夢回鴈宇殘篝。

好事近

白秋
海棠

腸斷碧秋煙。不是困嬌時節。空有一痕冰淚。滴牆陰殘月。燕支成粉不多時。便粉也消歇。還把七分春恨。向西風低說。

金籬子橙

風味木奴堪作佐。色飽秋腴。釀得金罍大。霜外摘殘餘幾箇。一年好景重陽過。試搗香齏新酒和。愛煞柔荑。搓後纖羅裏。況是江南鱸玉破。絲絲付與廚娘可。

水龍吟

秋日
環溪

幾番款竹敲門。林陰漸薄荷衣碎。蒼雲一片。青苔鋪徑。西風吹袂。白髮多情。小橋依舊。嫩涼歸水。覺香來何處。詩魂染透。詩都在。濃香裏。碧落塵空如洗。倚高窗。隔江眉翠。棘籬葦箔。豆塍瓜堰。畫秋無際。露冷紅芙。霜清圓菊。動人遙思。把芳尊付與。明蟾影底。伴重來醉。

菩薩蠻

著老堂
秋池

穀紋細細流泉割。橫階一片琉璃活。水面欲生涼。涼生先倚窗。幽人來照影。丁倒簾花暝。綠淨認澄潭。秋螢飛兩三。

買陂塘

仲秋集東園

貯幽壺。颯然涼思。淡人情致如許。枯荷折葦驅殘暑。一點月香懸樹。鷗試住。認短短平橋。野水當門護。軒窗暗數。看白髮梳風。冲襟浥露。秋豔待分付。重經處。依舊回汀斷瀨。蘭成憔悴吟賦。玉琴彈徹天容淨。消得酒經花譜。雲半縷。聽隱隱。漁歌隔岸斜陽暮。江南舊侶。怕社燕將歸。殘蟬對語。沙尾挂帆去。

醉太平

山館春夜。竹町對鷗。至自錢塘。

山心水心。梅林竹林。春風吹到樓陰。喜今宵共吟。情長坐深。年移鬢侵。紅燈綠酒頻斟。動窗前玉琴。

綺羅香簾。

春色從窺。庭陰自曳。愛說吳儂曾織。十二波橫。窄地風搖晴碧。紅樓啓。燕子飛時。繡牀垂。杏花開日。最憐他。犀押重重。細縈煙篆。閉愁寂。閒窗猶記倦倚。正無人畫永。絮吹狼藉。小雨如塵。一桁嫩寒難隔。控瓊鉤。淺夢湘娥。懸素額。暗思仙客。未須嫌碎影。參差捲花篩。月入。

如夢令

香在翠簾中度。人在溼雲中住。鳩語晚生寒。夢入竹籬深處。春雨。春雨。落了梅花一樹。

虞美人

榆錢。

青青小串生愁思。莫共苔爭翠。年年狼藉怨殘紅。試問枝頭能買幾春風。一番香雨新晴驟。已時春歸後。沈郎階砌漸無多。更奈楊花飛墮謝庭何。

攤破浣溪沙

題搖碧齋。

野水潏洄兩版寬。不安窗戶儘幽閒。畫卷書籤從載了。少風端。鷗
夢破時舷叩月。魚波平處檻橫煙。只有綠簑相識得。下前灘。

蝶戀花

題汪西顯花
塢卜居圖

攜得琴書湖上住。猶道湖心。未是深深處。一鶴煙霞思占取。淡香引
入梅花去。花北花南雲幾縷。人在其中。當了閒家具。何日真來敲
竹戶。泉聲相答幽禽語。

湘月

鑄竹
屏風

誰裁碧玉。把楚雨湘雲。安排花底。坐隔春風逢客至。一段歲寒詩意。
雲母爲胎。琉璃作骨。那得清如此。纖塵不惹。望來猶是煙翠。底
用六扇橫施。隨人屈曲。賦就誇棋子。縱是雕鏤紛滿眼。稱得文窗人
倚。簾映波紋。闌回卮字。別有涼秋致。漫遮月影。透空疑上藤紙。

四字令

秋雨初涼。坐
山館西廊。

蝸牆篆苔。書窗麝煤。秋風小院同來。看薇花正開。茶斟數杯。詩敲
淡懷。蕭蕭一陣涼催。碎梧桐半階。

繡帶兒

緩帶
鳥。

繡帶過身長。偏惹落花香。認作銜巾青鳥。可惜不成雙。林密伴鶯
藏。閒院落。跳躑何妨。綠陰陰底。雲裁翠翦。一晌飄颺。

醉桃源

暮春。

輕寒輕暖最愁人。看看過却春。海棠褪了到梨雲。楊花飄滿巾。天
淡淡。水沄沄。多情惟酒尊。韶華不戀老來身。虛亭風雨頻。

瀟湘夜雨

晚清軒
新竹。

鸞尾才分。綳兒初脫。翠梢已是珊珊。昔曾吟處越高閒。風不斷。泉聲
自遠。窗乍啓。雲影添寒。還堪愛。偏知巧補。轉覺庭寬。青棠花外。白
蘋沼畔。一例平安。向抽空溼粉。選箇漁竿。書舊句。青光待斫。聽夜雨。

逸調先彈。須留與。磚爐笛簾。三伏叩門看。

賀新涼 午睡。

新燕梁閒語。最無聊。日長人倦。翠陰庭宇。飛盡楊花心共遠。彩翅翩
翩自舞。正竹几藤牀斜據。雙眼瞢騰書卷在。儘蕭閒。林影橫堦去。簾
隙裏。度香縷。安神便與羲皇遇。任瓶花。欲開更落。紛紛無數。惟有
清風時破卻。一盞雲腴勝乳。問此去。鄉遙何許。滋味黑甜誰會得。怕
吟多。遮斷華胥路。渾未覺。客敲戶。

蝶戀花

行菴鶯栗花同
南圻漁川作

露片風囊先有意。白白朱朱。襯出林陰翠。自是客愁無萬里。年年點
綴閒庭砌。吟次紛然飄滿地。黃鳥飛時。狼藉留無計。竹裏經聲人
散未。忍饑日暮還相對。

最高樓

登遙
峯閣

清陰密。熨眼上平梯。幽翠一壺迷。殘春賸有餘芳殿。高窗未礙遠天低。算中間。開別境。與詩宜。看一霎。雲光遮不住。愛一抹。嵐光濃欲赴。渾不覺。凭移時。蒼濤白鷺三江外。落花飛絮五塘西。倩芳醪。邀寸碧。對斜暉。

好事近

辛未十二月舟泊清江。遲家兄南還。立春日也。

倚棹古黃河。水國春歸時節。極目鴈飛來處。憶長條曾折。離情消盡酒杯中。燈花幾重結。猶有今宵客夢。隔霜隄殘月。

齊天樂

蛾

玉蛾似夢初離蛹。纖纖粉痕愁絕。弱羽如冰。單綃入畫。半化南園風蝶。蟲天漫別。問園客多情。當年曾說。更愛釵梁。幾回同闌上元節。而今閒情頓減。怕花閒又到。銀屏輕帖。曲裏聲長。燈前火暗。無復珠庭瑤闕。看山意切。甚螺黛橫空。脩眉遙列。正值初三。一彎還映月。

謁金門

棟花和玉几

陰漠漠。棟子花開簷角。催得韶華都過却。東風渾未覺。
喜有茶杯
相約。低映一枝紅藥。只恐明朝吹又落。閒吟無處著。

浣溪沙

夏口湖上

蘸柳波明與岸平。水雲分影趁人行。野航隨意午風清。
數點雨飄
湘簾冷。半塘香散越蕉輕。此些三弦。月隔林生。

菩薩蠻

水亭

綠楊影裏浮萍破。歌聲斷處搖船過。重到淺汀邊。藕花如去年。
紅
亭開四面。依舊閒鷗占。一陣水風涼。和雲和雨香。

南樓令

秋院

秋色小庭閒。和秋度石闌。傍秋花。爽入吟箋。剛是竹風吹夢醒。聽一
片玉珊珊。天外鳥飛還。斜陽過雨殘。看餘霞。明滅林端。定有涼蟾。

今夜好。須憑著。酒杯寬。

又歸燕。

社鼓一聲催。茅檐秋半時。算江南江北天涯。回首落花雙翦翠。驀忽地。背人飛。何日是來期。春風百五遲。下重簾。總是相思。銜得愁來成玉瘦。偏不會。共愁歸。

解佩令 竹窗。

風生藤紙。涼生棐几。襯花壺。雪蒼雲翠。冉冉紛紛。搖不盡。瀟湘秋意。小紋疏。晝陰如水。庭隅點綴。廊腰幽邃。最宜人。茗香眠起。一翦無塵。吟淡句。別成清閨。勝橫看。老迂畫裏。

浪淘沙

秋日雨中。題高西唐花卉卷。

妙筆勝青藤。露冷風清。一花一葉一愁生。花有數般愁萬頃。無限飄零。宿草已青青。舊夢無憑。芙蓉何處主仙城。細雨亦知人有恨。灑

遍閒廳。

龍山會

九日梅
花嶺

素節孤鴻叫。易得愁成。古嶺同登眺。枯梅生畫悄。荒原外。牘見落英黃小。蕭瑟舊亭臺。還極望。碧天空窅。黯銷魂。城隅臥碣。一痕殘照。依然淮海東流。今古匆匆。不了閒雲笑。西風休戀帽。無人語。月夜鶴歸華表。回首已年年。持螯手。秋腴鬢老。問明年。攜壺甚處。盡醉方好。

明月逐人來

南圻齋前新種
松梅數本因賦

高柯貞絕。斜枝清絕。窗櫺外。澗雲江月。漫添客土。休共春風說。一種凌霜犯雪。何況疎筠。只隔小池幽撥。邀閒玩。歲寒時節。冷香翠色。先入琴三疊。不怕冰弦凍折。

南鄉子

懷竹町對鵬
兄弟湖上

音問阻江關。兩地相思水一灣。只有雁行從伴得。湖干。目斷南雲歲

欲殘。何日棹船還。想見層巖冰雪寒。若向逋仙山下過。憑闌。應對梅花悵獨看。

金人捧露盤祀竈

潔明粢。斟明水。薦明禋。一年年。請慣比鄰。黃羊依舊。掃除曲突徒勞薪。全家羅拜。恍深宵風馬雲輪。夢誰營。形誰役。人誰競。物誰分。更何煩。上告天閭。殘年飽飯。犬貓無事雀兒馴。麟經半卷。據觚聽。便荷神恩。

南樓令新晴渡江

便覺境非凡。中流逸興酣。四無風。一葉雲帆。欲寫晴光無寫處。渾不覺。到江南。回首影空涵。天青水蔚藍。喜多情。浮玉輕嵐。不似去年波浪闊。有沙鳥。導吟衫。

眼兒媚

將至吳門。先東陸茶塢。

蕭蕭暮雨起吳謳。雙槳劃春流。故人花外。舊遊夢裏。往事橋頭。吟
情酒意尋常有。欲放五湖舟。閶門楊柳。琴臺風月。先訪閭邱。

月下笛

宛轉橋
晚步

暮色蒼然。夕陽半落。雲明滅。曲闌干。摺散了。狂蜂蝶。幾許詩心。休
向垂楊說。山重疊。正閒時節。人倚平橋月。

滿江紅

渡太湖

滉漾無垠。三萬頃。春波練鋪。四望裏。水迎山送。煙挾雲扶。一葉舟輕
鷗外遠。滿弓帆飽。鏡中孤。喜今朝。安穩浪花中。風半湖。羅萬象。凌
太虛。橫玉笛。駐金烏。向中流。容與。談笑歌呼。茶竈筆牀。逢甫里。功成
身退。羨陶朱。算往來。兩度翠壺行。偕釣徒。

百字令

送竹町對
鷗歸錢唐

故山何處。悵尊前斷鴈。一聲嘹唳。極目孤帆懸短夢。不是間中遊歷。

落葉蕭蕭。澄江渺渺。水與雲同色。此中人去。蘆梢低映頭白。曾記
笠澤分題。風燈煙渚。握手成南北。何況新阡躬負土。黯黯麻衣如雪。
九里松聲。兩峯月影。冰斷愁千尺。寒潮嗚咽。陸家兄弟堪憶。

瑤華

著老堂
咏梅蕊

陽爻子月。入眼紅椒。似一痕初點。珠胎玉粒。還又是。的礫香心難展。
清池搖影。也逗起。隴頭人怨。是依然半返冰魂。誤卻高枝柔腕。翠
壺空裏相將。釀詞筆春風。後日曾見。棲禽小小。早占斷。竹外閒廳幽
院。西湖千樹。想猶鎖寒雲一片。待月明吹笛煙江。約共何郎吟遠。
謂竹
町對

鷗兄
弟

絳都春

環溪
桃花

霞欹霧驪。又萬樹弄晴。一溪紅破。印蘚徑紆。臨水窗低。和煙鎖。今朝
未許春泥浣。算留得。春風酬和。去年芳訊。魂消半面。者番纔果。炯

娜。鶯捎燕掠。斷橋外掩映。翠筠千箇。豔色豔香。飛上吟箋。眞無那。多情直欲花閒臥。便一枕。遊仙吹過。朗吟月轉汀灣。倩誰伴我。

浪淘沙

秋江晚泊

蕭瑟滿船秋。蘆葉汀洲。潮生潮落趁閒鷗。一片暮霞遮我住。客興悠悠。酒酌兩三甌。雲水淹留。沙頭風色未須愁。多謝漁燈相掩映。回首僧樓。

南樓令

嘯齋竹町對鷗漁川偶過山館爲此曲見寄撫今追昔黯然於懷因和以志感

竹色冷冥濛。苔痕石徑封。助淒清槐雨桐風。重覓前蹤何處覓。消歇了。幾枝筇。蟬噪小樓東。閒吟客偶同。歎逢迎。酒盞成空。觸撥愁心江水上。且休說。隔江峯。
對鷗有欲豁雙眸何處豁獨自上看山樓句

女冠子

庚辰孟夏偶憶晚清軒觴咏之盛多在綠陰芳卉中年來此風邈不可得因填此闋寄南圻京師

四月十七
宋人成語昔曾於此日同玉几賦棟花小葵又曾與同人於池上作初夏詞棟花簷外風急。游絲飄盡。燕雛方乳。

一徑苔青。一池波碧。醺醺開又畢。幾日粉筠。綳脫錦葵苞。坼捲疎簾。看裊爐烟。閒却茗香林隙。闌干五載。虛吟席。賸池魚吹絮。識箇中消息。舊情堪憶。怎便忍。楚水吳山。拋得燕雲千重隔。只有夢魂來去。片時南北。料關心添了酒。逋藥券。等閒堆積。南圻時抱疾粗愈

小重山

題江雲谿小齋雪圖

說著家山色欲飛。雲嵐相接處。有巖扉。松聲鶴語兩相期。銷凝處。天外看雲歸。悟盡世緣非。溪流堪滌筆。翠沾衣。人生何事願長違。清夢遠。同覓舊苔磯。

南詞齋卷二

譚瑩玉生覆校



詞 翁 蠹

著 元 調 李

本館據函海本排
印初編各叢書僅
有此本

蠡公羽詞卷上

綿州李調元雨村

定西番

萬里沙漠誰至。都說道。有人來。李陵臺。
漢使昔年持節。雁回人不回。聞道玉關此日。塞梅開。

長壽樂

聞謫伊犁作

無端掩袂。記去年。壽域宏開之際。絃管聲中。珠簾門內。負恃千嬌百媚。又誰知今日。離愁萬般牽繫。空幾度遣人投玳問筵。總難憑。怕對錦衾繡被。聞人說。此一去萬里邊城迢遞。忙檢箱寄春衣。未曾全檢。先盈眸攬涕。

鳳樓春

好事太匆匆。纔共房櫳。笑春風。一朝離別去如鴻。珠粉墜。髻雲鬆。那得誤人年少日。日守繡幃空。雨聲中。簾霧溟濛。倚闌斜望。一雙蝴蝶。趁花飛過牆東。莫箇書通。生恨千里五花驄。慣馱郎去。欺我鞋弓。

好事近

荷包牡丹

箇箇小香囊。誰做這般精緻。想見嫩紅輕茜。費盡春心思。牡丹雖喚不同開。何況色香異。卻怕問他根底。題當歸名字。

錦堂春

風動簾鉤響月。雲籠寶鴨吞烟。門外麟麟車至。疑人到堂前。對鏡翠娥再點。啼珠紅蠟重燃。相逢各訴相思夢。啼醒夢依然。

定風波

寄內

日暖風和柳絮香。一池春水浴鴛鴦。誰遣狂風兼驟雨。波起。陡教雙翼各分張。一霎雲開塵似洗。波止。祇應作主有東皇。重整菱花當

日鏡。心定。繡茵深處話淒涼。

感皇恩 被赦放歸作

湖上載扁舟。早決此意。非爲浮家泛宅計。簑衣臥月。任我日高慵起。問先生醒未。茶烟細。潞河雖好。風波無際。不如歸來潞江裏。花汀竹嶼。繞艇無非香氣。同心如少友。驚鷗替。

滿庭芳

裊裊亭亭。香車初卸。移步上瑤階。洞房初見。便聽別離催。眞箇無緣會合。背地裏含淚凝猜。春歸也。空幃凝望。腸斷日千迴。乍狂風驟雨。尋花已倦。忽地抽回。問桃源洞口。桃可先開。早見猩紅滿地。衣浣處。露濕蒼苔。還相問。難逢玉趾。今後可常來。

千秋歲 寄墨莊

春愁如海。海讓愁來大。波拍處。心先碎。任酒澆胸壘。醒後愁仍在。何

况又。空瓶小市無人賣。耿耿休言介。咄咄休書怪。人世事。多機械。足恭吾不恥。匿怨吾當戒。回頭笑。今生總是前生債。

後庭花

聽王四兒歌撲蝴蝶

日長金縷垂深院。滿庭花片。一雙蝴蝶南園見。溜波偷眄。和身倒撲去。輕羅扇。腕露黃金釧。纔得又飛情猶戀。一聲鶯轉。

又贈王四兒二首

當筵一曲如珠串。面流香汗。六么催唱重呼喚。櫻桃微綻。滿堂賓欲散。重開宴。遏雲聲達旦。歌舞教成炎涼判。回首雲漢。

又

姻緣雖小同親眷。肯教人見。且留待我書香案。拭牋擎硯。人間天上徧。何曾見。恁百長百擅。爭不教人心兒戀。雙眸雙腕。

更漏子

春夜闌。春雨歇。柳外一鉤殘月。春露墜。春風斜。曉鶯啼落花。春日媚。苦思睡。金鴨篆香縈穗。春色老。燕泥殘。燕還人未還。

解連環

此身誰託。嗟郵亭驛閣。半途飄泊。憶昨歲。華宴繁吹。乍雲散雨收。恁般寥落。鸚鵡樓前。燕泥污。一牀絃索。想春將盡也。遶砌應生。手種紅藥。人生苦爲名縛。看楊花點點。飛過牆角。暗屈指。驚換流年。把拖紫紆青。總待高閣。錦里花開。定不少。茶爐酒杓。拚歸來。看水看山。全憑草屨。

昭君怨

畫裏宮人老盡。未得翠華巡幸。遠嫁出宮門。是君恩。莫恨匈奴遠。臨去留行未晚。底事拍琵琶。尙憶家。

憶秦娥

邊城裏。匆匆此去何時抵。何時抵。空教老了。繁花細蕊。愁來怕把
闌干倚。馬蹄萬里猶不止。幾多風沙。幾多烟水。

江神子

落花飛絮又成團。倚闌干。晚粧殘。錦字無憑。再細把書看。節到清明
人准到。寒食過。尙長安。別時容易見時難。空誤妾。一春閑。生怕遠
山。添恨上眉端。寄語歸來須趁早。梅結子。半含酸。

減字木蘭花

韶光去了。杜宇聲中春悄悄。一枕輕霞。尙有紅粧不讓花。蘭閨夜
永。獨背銀缸和淚寢。纔夢還家。又被窗前鬧曙鴉。

又爲含笑嬈作四首

小梅十二。未解人前偷送媚。含笑含羞。卻把珠簾下玉鈎。靈犀一
點。惹得回身門半掩。莫便輕狂。不是陳家小素娘。

又

司空見慣。偏是分司腸欲斷。欲遣楊枝。白傅情懷尙屬伊。那堪巾帶。瓜子含顰不禁剖。玉杵無緣。從此藍橋路隔天。

又

驟來濃雨。滿地芳菲誰作主。託與東風。莫遣楊花入綺櫳。蝶殘蜂去。畢竟春光留不住。捲盡餘花。梁燕喃喃也咒他。

又

天邊遠戍。海樣深恩難細述。感荷情親。煩將錦字寄良人。尙聞消息。恩放歸來不須憶。縱有明珠。恨不相逢未嫁初。

謁金門

春雨細。滿院梨花深閉。黯黯簾櫳慵不起。睡擁鬢墮髻。已聽鶯聲學語。又見燕來凝睇。看看穿簾飛盡絮。尙無歸信遞。

又

風過處。吹落一庭輕絮。簾外歸來雙燕語。又是黃昏雨。蜂驚蝶舞。往往來來無數。試問落花誰作主。只流鶯未去。

菩薩蠻

紅爐暖閣笙簫沸。隔屏影影饒春氣。歌罷出門行。長途芳草生。夢裏時時戀。何日重相見。天曉有烏啼。天涯人未歸。

又

京華一去無歸信。嬌兒向母牽衣問。問爺幾日回。欺他說便來。忽聞驄馬返。又過燕山遠。教送復教歸。迴車涕滿衣。

塞翁吟 代內

聞塞翁此去。邊上雨雪霏霏。正是燕語鶯飛。忍獨守空閨。縱有木蘭從軍志。恐被認出雄雌。只落得。淚沾雙袖。檢寄征衣。非非。縱靡鹽。

不遑自主。也應念。白髮慈幃。况樂廣。羸休文瘦。潘郎鬢。不爲蓴鱸也。合來歸。倘能歸去。願守春暉。甘老柴扉。

點絳脣

冷屋香銷日長。簾幕光陰過。夜來慵臥。暗卜金錢課。針線慵拈。卻背燈兒坐。情無奈。待他歸來。爛嚼紅絨唾。

浣溪沙

滴滴花光潤欲酥。迷迷草色淺成鋪。一年好事在春初。樹聽鶉鳩呼婦侶。巢看燕子試新雛。薄情一去肯歸無。

又

斜掩金鋪日影移。水晶簾子畫長垂。春愁一半化遊絲。淺黛畫成楊柳妬。細腮勻罷杏花嗤。獨立無人不語時。

又

紅減雙腮翠蹙眉。夜來春雨小樓知。更無魂夢到空幃。玉步搖收攏髻懶。金泥裙卸解腰遲。人間無藥治相思。

蝶戀花

夜雨空留花一半。春睡遲遲。喚醒梁間燕。霞印枕痕留玉臉。眼波斜溜身猶倦。猛聽書來愁已散。泪迸書詞。更界胭脂面。越替解心心越亂。除非此刻真相見。

釵頭鳳

春光冥。寒宵永。小園驟雨聲聲猛。東君惡。無人託。杏腮啼紅。新柳怨弱。薄薄薄。晨初起。風猶勁。一池魚藻天如鏡。花開落。今非昨。萬般皆命。何厚何薄。各各各。

怨東風

鳳帳薰爐冷。菱花羞對影。魚書一去竟浮沉。恨恨恨。雨夕風朝。幾番

春愁。幾番春病。閨裏空多困。簾前人語靜。待將心事倩賓鴻。悶悶悶。無影無聲。半天月朗。半天星耿。

鷓鴣天

滿院春風鎖綠楊。一雙嬌燕語雕梁。纖纖玉笋拈花嫩。步步金蓮帖草香。勻睡臉。洗殘粧。薛牋親寫寄檀郎。儂家春色深深閉。不許狂蜂過短牆。

酒泉子

花笑東風。何事任他狂絮。捲成團。深柳處。雨濛濛。纔見花開又花落。洞房仍寂寞。掩香閨。垂翠箔。月明中。

南歌子

穀粟釵垂鏡。瓊瓏玉捲簾。鸚鵡伴涼蟾。憶君君不至。淚痕添。

生查子 憶舊

君家住那邊。妾住清溪曲。一自送君歸。春水年年綠。上灘還下灘。目斷雙蛾蹙。畢竟幾時來。淚灑江邊竹。

又

斜陽獨倚樓。一江風雨細。草色動清愁。黯黯生天際。鎖日悄無言。誰解人憔悴。惟有睡鴛鴦。知我憑闌意。

南鄉子 估客樂

綠水漲平橋。橋下年年度畫橈。葉葉風帆俱不是。無聊。早晚愁隨早
晚潮。潮水有時消。愁似潮來刻不饒。寄語乘潮來去客。纖腰。不是
當年舊柳條。

歸朝懽 涿州春遊二首

人過桃園宜載酒。盡道樓桑深處。正杏花零落怨東風。十分春色今
無九。綠野明似繡。看看飛絮皆辭柳。問紅樓。牧童遙指。正是他家有。

何須撥撚曹綱手。不用伊呀樊素口。但教滴破小槽紅。澆愁一斗愁何有。他鄉須得友連鑣。況復親和舊。笑人生。爲名爲利。空把春辜負。

百字令

路平沙軟。正芳郊雨過。綠陰初滿。無奈東風吹落絮。細逐馬蹄輕捲。牆外秋千。橋邊碌碡。又是誰家院。垂陽枝上。一聲鶯地鶯囀。且向野店青帘。無心更去。趁蜂狂蝶戀。宦海風塵。知負了多少良宵歡宴。兩鬢堆霜。雙眸籠霧。忍使芳菲晚。遙村何處。賣花聲裏人遠。

清平樂

遠山頻皺。乍覺纖腰瘦。怕見同心羅帶舊。猶繫別時紅豆。子呢喃。聲聲爲報春三。乍聽初回塞北。傳聞又去江南。畫梁燕

訴衷情

落花無主。春已去。雨霏霏。芳草濕。風起。杏交飛。滿院蝶蜂稀。依依。玉門歸未歸。寄春衣。

夢江南

千萬恨。日暮望歸舟。無限波濤無限恨。幾回風雨幾回愁。一鴈去汀洲。

又

千萬恨。垂柳復垂楊。長絆春風牽客恨。慣和煙雨斷人腸。無語倚斜陽。

蠡公羽詞卷下

十六字令

清。柳際秋蟬不斷聲。無人聽。又向別枝鳴。

搗練子

風過處。雨初收。柳外烟汀蕩小舟。一曲採蓮歸去晚。夕陽猶在水西樓。

漁家傲

留別陳韞山

夢裏南柯休再述。百年轉瞬如一日。交盡黃金無典質。歸計必。山中奴婢千頭橘。得失人間蟲唧唧。龍邱訪得還丹術。若待向平婚嫁畢。甚時節。漁樵一見應遭詰。

臨江仙

送岳梅巢之任山左參軍傲東坡體

管鮑只今君第一。一言九鼎誰同。人生真是馬牛風。去來都是走。順逆總難逢。此去青齊烟九點。大明綠樹濛濛。勸君一飲拚千鍾。先生眞醉也。喚取密雲龍。

又憶萬姬

雪是香腮雲是鬢。杏油輕點檀唇。一回相見一回親。無言推刺繡。有淚怕沾巾。記得蘭閨情定日。楚宮柳樣腰身。爲他眉黛遠山春。自應非蜀客。不解愛文君。

又

眼底韶光心底路。天涯芳草淒然。斷腸春色是今年。清明愁滿地。風雨睡連天。何日此身眞我有。幾眉看月山巔。不求成佛不求仙。酒中消永日。花裏樂餘年。

行香子 送六弟九皋歸蜀

圓月當空。歸興何濃。拚今宵須倒千鍾。煩君歸去。傳語山僮。添屋邊桂。塢邊竹。澗邊松。名利場中。爭看匆匆。十年來勘破窮通。從今歸去。作箇漁翁。釣一江月。一江雨。一江風。

眼兒媚

一捻纖腰是柳揉。無力織新愁。秋波乍溜。遠山半皺。長是低頭。曉來底事開唇笑。問著卻含羞。綠窻深處。樗蒲齒裏。贏得頭籌。

調笑令

送汝聰兄歸蜀

君去。君去。正是垂楊飛絮。那堪兩鬢風塵。千里迢迢。苦辛。辛苦。辛苦。屈指抵家端午。分付。分付。說與東津漁父。茅廬結傍雲山。塞上行人要還。還要。還要。添個石磯共釣。

又

風攪。風攪。驚散沙邊鴿鳥。波平一隻回飛。一隻獨留。未歸。歸未。歸未。

應識人間風味。聽語。聽語。堂上倚門望汝。須知家本孤寒。要把愁懷解寬。寬解。寬解。書看五車親買。

西江月

時序疾於奔湍。人情險過峯巔。等閑打破利名關。只在黃梁枕畔。不必君平善卜。何須管輅如仙。窮通只看鄧通錢。命定不由人算。

又

懶把雲鬟重理。羞將粉面輕勻。不言不笑慣嗔人。喜鵲從來無信。曲檻絲垂金柳。小窻絃閣銀箏。閒聽小巷馬嘶聲。遣婢門前試問。

如夢令

人去天南天北。兩岸蘋花初拆。春水滿塘生。不見歸舟消息。空憶。空憶。飛起一雙鷗鷺。

又

幾點海棠初吐。粉蝶雙雙飛舞。護取小猩紅。莫教拂殘鶯語。記取。記取。又是一庭疎雨。

又

記得寶鞍輕別。恰是小春時節。春去又清明。兀自杳無消息。何日。何日。江上滿帆風疾。

又

庭下丁香初結。屈指半年離別。最怕是黃昏。一點孤燈明滅。嗚咽。嗚咽。窗外子歸啼月。

又 陳華國聞予出京由務關進至涿州旅店話別

塞外行程將動。百里故人趨送。孤館話三更。但道一聲珍重。誰共。誰共。惟有月明隨鞚。

又

草草長亭鞍馬。繫在綠楊橋下。此地一分襟。回首斜陽高挂。休怕。休怕。到處雲山如畫。

一剪梅 三月十八日涿州作

春氣融和放柳綿。花也嫣然。鳥也翩然。平郊一望草芊芊。山也光鮮。水也明鮮。多病多愁已半年。絕少人憐。長得人憐。無拘無碍樂天全。詩裏神仙。酒裏神仙。

甘州子

夢回午枕畫簾前。拈翠管。寫銀牋。惜紅詞就日痕偏。換袂艷陽天。春漸暖。團扇一番圓。

又

踏青時節放風鳶。繩斷也。倩誰牽。盼郎心逐半空懸。何日續膠弦。春漸暖。又近麥秋天。

沁園春

新號蠹翁自贊

朱紫叢中。富貴皆嘗。此日休題。便前頭各有。風雲際會。何妨勇退。甘
老蓉溪。新舍初成。開尊行樂。任我狂歌醉似泥。回頭笑。這蠹翁真蠹。
覺路長迷。此翁蠹更難齊。負骨氣。何曾頭略低。有羊腸熊耳。甘遭
傾跌。龍鱗鳳翼。懶去攀躋。山嶠蝸廬。水村漁舍。歸去應無別箇擠。官
休做。莫蠹將極處。送去伊犁。

摸魚兒

感懷

嘆平生。向人肝膽。他心難似他口。雲雨翻覆思前事。處處老拳毒手。
蝸左右。蠻觸鬪。十年夢覺徒搔首。此生大謬。算燕許文章。范韓功業。
素志竟空負。瀑江水。難滌衣間積垢。秋風開遍菱藕。五十齊頭今
衰矣。只可驚朋鷗友。聽擊缶。君不見。紛紛鷸蚌爭何有。漁翁在後。問
昔日陶潛。歸來爲甚。非爲一杯酒。

木蘭花

今年春事關心事。月未圓時人未至。閉門花落雨聲中。鎮日昏昏只思睡。曉來窻外有烏啼。百日歸期恰應時。黃鶯久住成相識。細把離情訴柳枝。

滿江紅

癸卯四月初八日回通州作十首

笑問青銅。誰使汝。鬢添霜雪。人住久。驛亭春過。幽禽調舌。剖地風猶連日橫。中天月是何時缺。望九重。誰送赦書來。燈花結。兒女淚。悲休咽。昆弟勸。言何切。要田禾親種。園花親折。不課成丁黃犢飲。且求向丙嘉魚穴。待鄰翁。曝背話君恩。從頭說。

又

去暴何嚴。誰令爾。如湯灌雪。今始悔。不如馮道。但深藏舌。噉噉由來原易玷。曉曉漫說終難缺。笑從前。談笑伏兵戎。深相結。非痴絕。由

忍咽。非性直。由心切。奈天加憐惜。人偏磨折。勲業站鳶愁墮水。利名
鬪鼠餘空穴。想當年。炙手輒遭嗔。低聲說。

又

不合時宜。嗤越犬。從來吠雪。曾五嶺。兩經龍窟。多遭鳩舌。漫說可磨
圭不玷。難言已破甌。無缺。笑年來。無計洗煩愁。腸千結。三更淚。寒
泉咽。千條計。雲山切。悔寧爲柔廢。何爲剛折。墮烏顧巢。頻認樹。邱狐
守舊唯思穴。話知心。除是鵲鴿原。同他說。

又

少列金閨。曾共忝。梁園賦雪。休再憶。步趨螭首。口啣鷄舌。丹筆已書
安國背。黑衣誰補舒祺缺。對窻前。仰看日光移。香烟結。曾直把。危
言咽。曾直把。忠言切。記當年。廷檻。朱雲曾折。魏博卽今悲鐵錯。漁臚
自昔嗤金穴。賴何人。乞得此身回。眞難說。

又

非見青天。誰便許。沉冤一雪。何必又。巧言如鳥。向春饒舌。蛇足添來翻是累。兔唇補去終嫌缺。算此生。都是命安排。前因結。離虎口。翻悲咽。思鳥道。轉淒切。笑顏真難厚。腰真難折。杯酒易生蛇角影。風波難信鱖魚穴。笑從今。有話只三分。逢人說。

又

塞外荒寒。今幸免。陰山踏雪。前數定。著龜難信。不須搖舌。水到滿時當必覆。月將圓處先防缺。待從今。春過定歸期。黃梅結。花滿地。鶯吟咽。楊糝徑。蟬鳴切。看蕭敷雖好。蘭摧甘折。劍氣已離雷煥獄。枕邊早夢盧生穴。要生還。須問紫芝翁。聽渠說。

又

負債如山。誰教爾。清如水雪。須信道。于垣防耳。厲階防舌。毀豈能傷

曾子孝。過須學補周公缺。欲澆愁。沽酒典春衣。衣鶉結。蠮食李。由他咽。鮎上竹。非吾切。要人情嘗遍。如肱三折。只道橋平驢穩跨。不防堤壞螻穿穴。笑平生。亦有范張交。誰先說。

又

江上簑翁。常勸我。寒江釣雪。從此去。築廬高臥。閉門藏舌。只倩長繩將日繫。何須煉石愁天缺。問他時。歸去作何人。爲元結。春釀熟。新槽咽。春雨過。提壺切。要陶潛巾漉。林宗巾折。天外翔鴻防下藪。水中智獺居高穴。問行藏。漁父最知幾。休浪說。

又

自笑髫年。何苦學。囊螢映雪。今老矣。硯田猶在。只宜耕舌。文字不留他日謗。殘書尙守當時缺。望我眉。萬點蜀山尖。歸思結。三月暮。鵲聲咽。三峽暗。猿啼切。想家園垂柳。行人都折。鵲冠子唯貪著述。鹿皮

翁本甘巖穴。待回時。讀盡各奇書。同兒說。

又

雖是安貧。何便少。烹茶掃雪。如見問。但隨張口。教他看舌。起舞原須
鞭著早。高歌漫把壺敲缺。笑去年。爲我寄征衣。憂思結。鶯再轉。笙
簫咽。鱸再膾。鸞刀切。幸前番生別。未成簪折。天上何曾銀作漢。人間
尚有丹成穴。問謀生。推醉只搖頭。醒來說。

賀新郎 懷歸

借得誰家屋。更閑將。舊時經史。剪燈重讀。忠孝原皆吾儒事。誤我子
張干祿。看古今。人情翻覆。已悔亡羊遲未補。又安知。失馬非爲福。燃
灰事。思爛熟。將軍恩重難書牘。問何人。賢如晏子。解驂爲贖。三徑
蓬蒿荒也未。歸去雲龍山麓。正故里。隣翁酒漉。得失鷄蟲何日了。如
以爲。未足今知足。辭去隴。只望蜀。

又落鳳坡弔龐士元墓謁龍鳳祠

白馬原非馬。是坡前。將星應落。箭鋒齊下。猿鳥至今號日暮。澗水滿山哀瀉。更苦雨。松風瀟灑。試問劉璋今何在。鹿頭關百戰空堆瓦。三分事。一蘭若。綸巾羽扇雖風雅。想當年。伏龍鳳雛。共齊聲價。魚水君臣千古契。應悔酒間閑話。得益州。君謀是也。盡道名成八陣少。又豈知三策功高寡。爲此論。是誰者。

竹枝

十六首在廣東作

清溪深處種桃家。

竹枝

春後春前覩晚霞。

女兒

洞口誰家紅袖女。

竹枝

木蘭

船繫木蘭花。

女兒

又

槿花籬外竹橫橋。

竹枝

日日溪邊蕩小橈。

女兒

借問儂家住何處。

竹枝

蠟牆

低處認紅蕉。

女兒

又

荷花相映海南天。

枝竹

趁著鴛鴦去採蓮。

兒女

水上遊人沙上女。

枝竹

齊聲

拍唱相夫憐。

兒女

又

耳穿瑟瑟臉如蓮。

枝竹

翠袖紅粧半在船。

兒女

細嚼檳榔頰兩頰。

枝竹

笑招

行客喫潮煙。

兒女

又

水國偏饒蚌與螺。

枝竹

採真珠處水風多。

兒女

浪婆赤腳歸殘照。

枝竹

障面

團荷共踏歌。

兒女

又

秋入南天暑未收。

枝竹

桄榔葉暗蓼花愁。

兒女

家家結伴收紅豆。

枝竹

未解

相思已解羞。

兒女

又

淘沙浪裏弄斜暉。竹枝兩兩三三何處歸。兒女孔雀自憐金翠尾。竹枝驚人

猛起貼波飛。兒女

又

袖斂鮫綃窈窕嬾。竹枝採香人晚但聞香。兒女椰子內邊有佳酒。竹枝笑鋪

葵席倩人嘗。兒女

又

白蘋香裏水萍開。竹枝兩脚如霜水面來。兒女島上陰陰秋色暮。竹枝滿船

載得蜺兒回。兒女

又

風皺波紋動畫橈。竹枝采菱藤籠競相邀。兒女回塘深處長相見。竹枝不在

晨潮定夕潮。兒女

又

照水紅粧處處迷。枝竹 梅州無數鷓鴣啼。兒女 醉入花叢深處宿。枝竹 行人

腸斷是清溪。兒女

又

荔枝初結綠婆娑。枝竹 蜚戶人家笑語多。兒女 避暑信船輕浪裏。枝竹 閒招

女伴簇笙歌。兒女

又

朱蕉衫子綠羅衣。枝竹 載得羊城絕世姝。兒女 家在越王臺下住。枝竹 畫眉

京兆入時無。兒女

又

弄珠估舶與樓齊。枝竹 家在木棉西更西。兒女 行客候潮天欲曙。枝竹 猩猩

愁聽雨中啼。兒女

又

刺桐花落又花開。

竹枝

屬意郎君來不來。

兒女

暗裏故拋紅豆去。

竹枝

背人

騎象却先回。

兒女

又

瑤瑤堆盤剝荔枝。

竹枝

琵琶一曲說相思。

兒女

夜涼不用搖葵扇。

竹枝

只著

輕衫一藕絲。

兒女

臨江仙

三月初三日喜大兒朝慶
攜孫至通來迎相遇於涿

面帶紅塵衫帶淚。疑從夢裏相逢。不須信字亟開封。平安唯問竹。荒廢尚非松。來往雲山幾萬里。衣經慈母親縫。從今歸去作山儂。孫兒如犢健。老子未龍鐘。

浪淘沙

三月十八日移居吳宅紀夢

無意理絲桐。人困東風。窻前又見月朦朧。夢裏渾忘身作客。只似家

中。幸有主人翁。花滿簾櫳。酒興不如歸興濃。雨已辭雲雲更遠。回首千重。

小重山

選得幽居聊避諱。槐陰深碧處。是誰家。朱扉翠箔緣窻沙。人聲悄。燈下按琵琶。恨煞遶枝鴉。不知心裏事。苦呀呀。隔簾又見月痕斜。魂銷也。一曲後庭花。

阮郎歸

鳳衾鸞枕似當初。郎心恨不如。去年猶有數行書。今春書亦疎。眉倦畫。髻慵梳。愁懷不自書。消愁有酒祇成虛。那堪和酒無。

減字木蘭花

涿州店中記所見

雙鬟覆額。小小楚腰裙袂窄。只在牆邊。望斷桃花洞口泉。喚人偎問。翩若驚鴻終不近。底事風狂。爲見喬家小窈娘。

菩薩蠻

天晴。四野烟光媚。兩行柳色濃陰翠。麥浪不多翻。趁人蜂尚喧。野翁溪上住。繞舍桃花樹。疑有武林春。更無人問津。

水調歌頭

送陳韞山任永定河道之任

無笑白圭治。天子重河防。驚聞九重。舞鳳下詔簡賢良。百里潞河風快。千里渾河浪湧。喜氣共洋洋。賈讓疏宜上。平當策尤長。昨陳來。今李去。後先望。黃鷄白酒。吾正歸興動家鄉。一處朝朝相聚。兩處悠悠相憶。兒女況成行。勲業看廊廟。蹤跡隔滄浪。

水龍吟

決計歸山

男兒奮翅騰驤。封侯萬里平生意。一朝斂縮。功名豪興。付之流水。匣裏龍泉。枕中鴻寶。總歸拋廢。看擁書萬卷。酒經茶傳。閑來讀。無窮味。杜甫草堂深處。想浣花。風流未墜。橙林籠竹。直須縛個。茅廬傍寺。

犀浦晴烟。鷄坊晚雨。足供詩思。倘逢李八百。相期汗漫。話烟霞事。

西河 乙巳三月二十九日贈沈老

蕉窻外。朦朧一聲啼鳥。何人攜榼款吾門。隔牆沈老。酒闌多慨。聽清談。慙慙留語真好。問君去。何太矯。歲寒漸看生春草。平陂往覆。理當然。何爲苦惱。請看巧宦勢薰天。羸飢何似肥飽。田園歸計直須早。在家縱貧亦云好。世路閱人多矣。看南來北去何時方了。去也峨眉天之表。

